

張文定公環碧堂集

張文定公環碧堂集卷之二

書柬

寄東沙叔

徐九回承手書篇什之惠慰喜倍常恭諗起居康吉學
業升崇又更欣企也邦音萬里馳還蹇跛愁頻心神耗
憊所餘不息之貞朝夕耿耿然內無斗室爲藏修之地
外無別墅爲避俗之所不可意之人與不如意之事日
擾於前可謂至困顧易稱困爲德辨方以自試殊覺其
爲攻玉之資外物之累不足惡也大抵人於天下能悟
夫何思何慮卽合則於無聲無臭矣見若卓爾而力不

能赴安得一聞警勵於席間函丈地耶便中惟無惜誨
諄是幸三十叔瘡未全愈葵窓叔公甚以爲懷南都多
士之地而冰廳清燕之司聞從學者纔三數人恨未兼
收並畜耳吾門在學者八人忠甫嘉甫以萬公錄遺始
獲應試秋闈事數日內當知息耗矣來諭所謂昌被已
甚鄉居不及詳悉然推其一二足興浩歎耳

答朱克升

承不鄙示以陸司成之作內有欲爲改易者責生詳定
生何足以知之雖然邦奇用力於古文二十五年矣自
五經而下諸名作家之文無所不得讀妄自謂鑒識之

精雖卞和識玉或弗能過也子淵此贊恐不可復議今未暇悉辯姑舉其一二爲執事商之如紅日未雲詞旣清洒若改爲紅日宣光便覺俗氣逼人矣嘗聞前輩有以初晴詩寄先祖東臯先生者先祖讀其首句云煌煌初日耀樓臺輒驚曰安得此嚇殺人句耶因置不復讀紅日宣光與此詩殆類冠之首簡將無使人置不復讀耶碧山如畫改云碧山峙夏尤無意謂出其土苴云者謂執事藏道貞於中而所出者不過其土苴耳此正極其推重之詞如云六經聖人之糟粕豈亦貶聖人耶方將來居士於古之有道者句法自活若以方將二字改

爲人皆則一篇結句緩散無力而精神索然矣且安得
斯世人人皆有道士而知所求耶誤辱知愛敢此奉復
不知果何如耳大抵作文有音有節有體有骨有氣有
色有意有態此可以神會而難以口傳古云可爲知者
道今安得不爲執事道之

寄黃久菴

鄉居乏便久缺裁問辱示知罪錄非相愛不及此感慰
感慰語曰可與言而不與之言失人况高明如執事僕
承愛厚復十餘年尚不可以有言哉竊嘗觀一家之內
三數人焉舉一細事見人人殊况四海之廣億兆之衆

哉偶一事議論不合便相與仇讐同已者爲賢而異已者爲不肖皆非也周公召公之不相悅韓歐程朱皆大賢也而議禮亦各不同使數子者遂以是相詆訾以終其身焉君子惡乎取哉傳曰或出或處或默或語二人同心其利斷金大丈夫亦各于其心而已矣十年前所嘗促膝而語者敢復申之然言不盡意可勝耿耿顧所望於執事者惟無曰知我罪我而介介于懷焉幸甚

答倪汝新

共處甬東不得時時親炙萬松之游相去又數百里矣執事尚論有年出而友天下士朝夕會萃於名勝地與

之上下其論議爲樂豈有亞哉如僕素孤陋茲更離索
柰何用是欣忭之餘有感悵焉竊惟三峰大齋二先生
作士之盛與列執事感慕振發之心誠宜得大手筆一
揄揚之而松館之中文章淵藪少出緒餘光焰萬丈矣
乃不自居誤以屬僕於數百里外始知借聽於聾殆不
虛言耶使幣遠臨不敢辭輒具稿進惟增慙懔不宣

與良甫翁

人之患在多已而略人遼東之豕燕山之石爲世所嗤
久矣惟明者則不然何者其閱歷廣而知見的不以已
蔽不以人忽也比日稍暇始得檢對賢弟所抄鄙稿讀

之累日始而油然若自得繼而憮然若有所感終而戚
戚然以疑何者文詞之所以爲文在聲之高下言之短
長之間世不悟是其久矣而區區之作若偶有中於古
人之律度方欲爲人言之而今之天下未見有可與言
者往在弱冠屢試於館閣惟西涯翁竒其文以爲峻拔
而守溪翁者亦謂自肺腑中流出令人喜觀不厭迄今
二十年間文詞稍進非復曩昔比也然二老不可作而
予以避地江湖鮮復知已夫窺穰於淡采華於實會不
言之妙于闔闢舒束疾徐之間若是者雖古昔以爲難
嗚呼而謂今之天下有其人耶此所以油然而得憮然

而感者矣雖然作之二十餘年矣遇天下之英豪不爲不多矣其間豈無一人明者而自是若此其不爲遼豕燕石長見嗤於世者幾希嗟夫所以戚戚然而疑也吾弟乃獨不鄙手自抄錄不惜劬勩將吾所謂明者非耶抑亦蔽於兄弟之好亦猶我之自蔽而不知其劣耶願虛心以觀之直言以評之不蔽於愛而不失爲知我也幸甚

與朱侍御

去冬程公敏入京曾奉問時憲節已南行其書不至而復厚因貴縣萬吳二生略論動定日聞督轡淮揚復欲

脩敬念憲臺清嚴未果輕瀆正爾馳情忽拜專使手書
之辱爲之愧感交集且好道之志不以名譽希聞而自
足念舊之情不以形跡闊疎而見遺深造大就已斷可
識於片楮之間所用爲吾道慶爲吾民慶者豈淺淺也
近歲塩徒在處爲寇率因塩汰沮壞撓於貴勢滯於重
估存積興而常股廢公私困而盜賊滋其來非一朝夕
之故矣方今

天子勵精而百司徒務彌文未見有以實稱德意者故
焚焚積萬不一損爲可痛心以執事有爲之志能爲之
才而居得爲之地必有以一清夙滯以快遠近上下之

心者蓋道不出於事之外而經濟天下以配天地好生之大德不過曰理財正詞禁民爲非而已况今日所賴莫重於鹽法而積弊之深亦莫甚於斯乎邦奇誤任此官名雖近美而法意已非曠昔日了俗格誠是自愧又頗掌錢穀工役等務益知弊端積久不可勝窮欲少去一二亦別無巧法只在勤力勞心所謂居之無倦行之以忠此最所不易也常竊謂治身治人常使天知有餘而人知不足日計若拙而歲計則贏此古之大賢君子所以澤覃生民而光昭無窮視彼鼓篋一世衆方悅而爲士者已笑事未就而公議已不相容者何啻虛生一

世而已每以此自警日月云邁而進修不及今特自露
於知己之前庶幾有以交修不肖耳幸勿以其狂言遂
見遐棄也領翰已昏又聞來使明日遂行匆匆張燈布
復不覺其言之率爾惟加亮幸甚

寄惲功甫憲副

聞得背癰目青甚駭豈白璧青蠅胃中磊砢所發耶執
事素恢豁塵芥視世事籍有所甚不可遣斗酒百篇何
所不散固知無妄之疾非有感而得也僕家居四年幸
老親健甚而弟漸長簞瓢屢空歡如也李嵩渚官此數
相與道風情君王太守住東鄉經歲不面屬爲索東麓

吟竟成磋砢數僅俱遣治薄田欲馳一使數里外輒不
能困可知也題敕命碑陰董呈稿望爲竄易無讓辭在
孤涯四海兄弟落落數千里每用惘惘喪孫固可戚視
僕之頭白未嗣有間矣寬之握手末期書不盡言

復諸友讀纂修實錄

辱不鄙命以史事且諭引譙坤忘年折行此古人風度
極知感企第數年來習閒成懶出門數武動若千里又
竊惟實錄將呈上司經

命使以登進內局邦奇方以養病爲名而復與其事若
將自示其無病然者則其爲竹帛點已自不細尚敢覲

顏論是非欺百世邪至於學識年齒之非宜又特其一
端也向已懇二守先生於一應文移盡削賤名矣伏惟
亮之

復周玉巖

昨枉手書極知好善之篤所謂優於天下欽仰欽仰近
日監中舉人自會試水程外不三五月便得撥歷人無
專志亦無定業去年夏秋間得向上者四五人尋亦出
去近則未聞好學者也其言語肯及心性者竊聞之古
之人謂行貴而言賤况天下之物多則賤少則貴僞則
賤實則貴言本賤也而其僞而且多又極於今日今日

但當力師顏曾之愚魯下寧爲萬石君夏侯勝不然曉
曉焉以所賤益今日之疾誠有所慙痛而不忍爲者高
明以爲何如語曰可與言而不與之言失人於執事復
不能默

答友人

承示佳作氣充而健語新而奇善涵養之所就固未可
量也忻敬忻敬及讀裴行儉知人論爲之惘然自失喟
然而歎曰嗟乎曷爲其至於是哉辱不鄙不敢不以直
告惟吾子垂痛察焉行儉以浮躁淺露非爵祿器譬則
朽索不可以致遠杯水不可以運舟固不易之論詩曰

瑟彼玉瓚黃流在中豈弟君子福祿攸降洪範好德則
錫之福皆此意耳且五經言降殃降祥求福弭災趨吉
趨凶者不可縷舉彼聖人者亦固役天下之志于利祿
富貴耶其必有說矣孔子之妻公冶爲其不自致夫縲
紲也妻南容爲其可以遠刑戮也夫縲紲之不自致刑
戮之能遠所謂賢也正君子之所取也若田也不得其
死則固深戒之矣聖賢者亦豈遠人情哉語曰君子不
重則不威今也甘心浮淺之歸而曰吾非志於爵祿者
則行儉之罪人尚何說哉垓下之功萌於圯上登壇之
績基於伏膺今一不禮於人悻悻然見於詞色詩曰志

我大德思我小怨吾子其未之審乎且國武子招他人之過猶以見殺况乎義師生也恩骨肉也未見其不義而招以爲過其於器識何如哉此僕所以惘然自失喟然而嘆者也通家之愛疇昔之知過承手翰慙慙下問敢畢露其狂愚惟吾子垂痛察焉

與聞提學

聞吳中刻六子甚佳惠及果然感喜無量雖倦中不覺把玩至夜分也因思書之可寶莫如五經止本文有新刻而不及傳註人情厭常好異以程朱傳註爲腐爛不足觀言諸經則尚舊皆註疏此大不然竒冒取十三經

註疏讀之豫置簿一扇將筆記其可取者讀之竟歲
一言可取則已爲朱先生所收拾乃知文公真大豪傑
正如伯樂一過冀北馬無留良焉矣而世俗大議淺也
之士曾惡足置齒牙間哉執事爲文宗於文獻地欲望
責令江南富室將五經傳註今日所尚士子所通習者
刻之如刻六子之精且美豈非一大快事亦足爲崇正
學洗膚末之一助也哉冗中呵凍不成書亮之亮之

與馮子和

兩道貴治使人忘其爲客旅也斯文雅誼一至於斯銘
佩銘佩舟中無事得詠新篇遠致清聲令人歆慕然區

區之愚猶望公餘玩繹五經四書益廣終身受用之資
蓋文詞之於人猶華藻之於木也當其燁然在目自不
可少乃若棟梁廟堂具瞻天下則于質幹而不于華藻
矣使經書義理涵蘊醇熟然後發而爲文則固儼諸日
月星辰之於天山川海嶽之於地區區鮑謝之流又無
足齒矣此僕自幼狂志垂老未償知契間有不能不言
者亦冀便中有以相勗勵也卽日席庇及淮回首馳情
倅去附達區區千萬照亮不能悉

寄友人

邦奇幸以弱冠獲親風範伏見醇明正靜竊自師承口

下言而德氣感孚固有在於語言之外者奉違二十
年去數千里然執事退而過于進修進則光其志業
風聲洽聞瞻想如見形迹睽違有不得而間者可勝慶
忭之至邦奇離京師十有四年未嘗敢以片札抵政府
投棄顛阮分所宜然嘗竊惟之孔門之徒三千而為邦
之道惟克己之顏子聞之蓋克己則公公則溥未有不
公不溥而可以為天下者也廼者不意不肖之名誤塵
薦剡之末復自海壖濫竽國學且邦奇素未敢希于執
事而執事亦焉所私于區區此古之大賢得時行道以
待山林之遺佚而昭

聖世之至公者真足以蕩洗數十年來奔趨附託之陋
習第顧區區庸劣實無德以堪之拜命以來夙夜兢慄
罔敢休暇恒恐上負知己下負平生伏惟高明察其愚
魯不忘誨愛以卒掖其成幸甚幸甚辰下秋暑未諗台
候如何伏惟為道保蓄以副上下倚庇之切無任拳拳
企望之至

答萬子坤

一別十餘年此心懸想殆如一日邦奇僻居海壖者前
後七年間一入蜀往復徑楚瞻望只尺竟亦無便可以
通問屬至南京又以公私事冗不覺磋砢時因貴鄉詢

起居無恙而已高生來得手書恍復隨州傳宿晤語之
日欣慰無量近日學術風俗可憂誠如來論大都只為
不知天道可畏肆為欺誣究其志亦只為一身為旦夕
計而無復百世以俟之意顧少有資性者亦復不訊顛
末靡然從之奇正為是深悲而未知所為救援也今亦
力自進修無采訪有志者時時接引以示意向然而未
聞好學者也若槩語以上達則豈徒無益亦自涉於為
名之病且孔子失人失言之訓不可不審韓子所謂不
請而教孰云不欺是又宜自審也今天下質直好義卓
然自信而不為名利疚者僅見吾子冲一人望努力樹

大使足以質鬼神而俟百世天下事此盛則彼衰若徒以口語搏擊或成黨禍亦非君子所願也胡敬齋亦篤志士居業錄多可取者但所論釋氏誤以神識爲性一跌卻反以氣爲妙乎理者與程子心如穀種邵子心者性之郢郭言意不同渠於源頭未瑩恐未足以降釋氏耳陳于廷戶部蜀中嘗一通問近復如何便問幸道意不能悉日來所得毋惜時時寄示千萬千萬

與魏郡侯及齋

老覺光陰逝水世事空華惟夫敦帝迪之勸大靡悔之地盱前修而不耻俟後人而不惑庶幾無負平生我者

之意而愧猶未之能也高明亦何以教之

與李介卿憲長

蓋天下之可貴莫如吾斯之能信可樂莫如吾斯之得
行行之得不得在天而信之能不能在我考實於在我
者不使自欺委命於在天者罔敢或貳如是而已執事
信道不惑篤實輝光日躋顯榮其所得行當不止如今
日焉耳某久忝知愛欣慶可言

答萬鹿園

聞榮任欣慶欣慶且奉瞻有期尤慰積渴之懷大抵人
生以天地爲大父母則諸同胞之親顛連無告惟吾爲

大父母所鍾愛力足以援而大之乃坐視而不顧則豈
惟吾之心不自安而大父母者且將怒色於我其如之
何至於宇宙旅寄則不必容心豈特吾身旅寄於宇宙
雖宇宙亦旅寄也顧在我所以主張宇宙而愉悅父母
之心者則有不容以一息懈者耳書曰勅天之命惟時
惟幾蓋直見夫天命之親切而不容已也漕事誠繁非
執事處之更將誰諉書曰朕言惠可底行高明其鑒念
焉不宣

寄萬鹿園

兩枉存問眷惠優渥不勝愧佩伏惟王事靡盬夙夜劬

勤不及躬致啓居豈勝馳情專人代候燕聽入城的期
幸賜照察近閱藏覽益知明道所以論釋氏者極爲公
當讀佳詠仰見執事所得於釋氏者已深鄙作次韻聊
見區區幸指正之大抵六經中精髓處被釋子咬著程
子謂其見天之一隅却徑覩到北斗處者是也凡人生
所最難處而易爲此心累者在一家倫理之間佛家知
其然便一切拋却徑入空山中了一點忍心成事由
此害事由此聖人五十而慕佛子七歲思出家父母不
從便終日不食以要之又曰汝言與心親父母非可比
借其時父母憂悲成疾則如之何聖人事親如事天故

能以家推之國與天下以天道覆萬物而不遺殆非釋
氏者所及也愚見試正於高明專俟面悉

與全汝禮吉士

承示高篇讀之數過不覺增敬喜恨塵冗不得時時親
左右一罄所欲言耳蓋古之善論文者莫如孔子其次
莫如韓子孔子曰辭達而已矣言意以爲主而文足以
暢而明之者爲上也韓子曰氣盛則言之短長與聲之
高下皆宜言氣得所養則律度自我出文斯妙矣故天
下莫貴乎意得意得則志治而氣完是故出之肺腑而
施之不匱闔地關天鞭風駕霆而不知其所以爲之不

然自門而入者必非家珍雖其鋪列序簡而人見其竊
人之有也不適爲譏噓資邪然意得莫如明理明理莫
如讀書是故韓子又曰非三代兩漢之書不敢觀非聖
人之志不敢存存聖人之志以讀聖人之書玩之久而
體之熟其於文乎何有夫龍翔鳳舞豈有習作矯強之
態哉是故三代兩漢無鑿詞魏晉而下斯有之耳韓之
所以起八代之衰謂其不蹈襲不刻削而神會律度之
妙耳雖然韓子之文視孔子則有主賓之辨焉孔子主
乎意而文從之韓子主乎文而意以就之孔也韓也其
斯有辨矣夫六經者聖人所以寄意於萬世者也於是

乎求而得焉則奚必有意為文而其為之也如日月星辰之在天也如江漢河海之在地也而韓子者且趨吾下風焉矣僕與足下同鄉而不相識於太學見所為文焉心固異之然時文云爾今茲居翰林不干鄙辱以古作示知見內融疾徐中度則知足下蓋厚賤於天而善自養者人或後意為文而於高下短長之節終身焉不悟間有知者而意非已得鉅釘紉綴篆刻琢削索然不見其所有此其故何也其稟偏以畱其習乖以踈闊於天下如足下何可多見况一鄉之內哉夫安得不敬且喜乎迂狂之見懷之久矣一為知己者伸焉惟鑒而裁

之

復祝太守

執事外補心知為屈然時之獲戾當路其受抑固有甚
於此者况事由天定非人所能為耶僕叨第後細讀五
經見聖賢畏天悲人若是其切私心欲得一郡為之而
其路無由後於他書見楊文貞公以平生不得為守令
為恨乃知丈夫所見略同百年易過富貴如春藻耳人
生惟澤及民物不負

皇天生我之意乃為有以自慰而澤之易流今日百司
執如郡守執事治太平聲實懋著深慰區區至有不寐

之喜而來諭以跪拜為意若有不屑焉者僕誠惑焉韓
魏公作宰相成大功業及老而典鄉郡後進以監臨行
部魏公執下司禮甚恭君子素佐而行當跪而跪當拜
而拜苟中乎禮即與饑食渴飲何異而有所不甘耶辱
愛厚不覺盡言伏惟亮其悃誠不盡馳想

復徐養齋

奉別遂經許時自前歲一通問後每有南行之意謂得
拜瞻晉陵不覺久虛修候不意兩疏未遂荆川來領手
教感喜殊甚即欲奉答塵冗未能比日小恙杜門力疾
具此聞清恙未全脫酒為情事多不如意竊惟造化無

全功自光徽氣滴人生所稟愈不能全知其任天順以受之卽胸中無一事譬如父母當事勢糾紛之時分付其子處之爲子者以事之逆而難也少有拂鬱卽與親心有貳不得爲純孝矣况天之所以賦公者已自有獨厚於人人者乎常以古人善處變者思之卽泰然矣高明何假多贅雅辱知愛不能已幸亮之

答人柬

辱不鄙示以肝膈三復悚歎然竊有疑焉夫旣曰不以一人沮之而不足又曰無以自雪旣曰天下國家未必盡非又曰讒深毀重似自相悖也况此謗之起來歷

頗著而公之履歷素昔甚明皮毛曾莫之傷其奚所銷
鑠耶公論未始不定而又焉俟爲僕寡昧然素所期於
公者非淺淺也萬斛之舟搖於寸筵不能不恠且歎焉
以今日上下皎皎若此執事猶爾悒悒使執事爲郭汾
陽嬰魚朝恩之讒爲狄梁公事淫虐之女主必汲汲焉
以一去自白而不復爲天下生民

朝廷社稷計矣勿頸剖心如灌夫之流較之大雅君子
真培嶁泰岱籬鷗雲鵬何可以同朝語也嘗喜蒙莊熟
於世故雖不可盡以爲泠然不知其意亦未爲達也達
人大觀吾非執事之望而誰望哉客至草草痛啻痛啻

復汪汝成

晦翁嘗言人養得半月亦便不同邪竒此爲眼疾兀而
起止徃徃多自恕經今兩旬覺無寸進益畢竟以一杯
水掬車薪之火其不熄固宜方欲少加苦志而柔姿
弱植深以不能持久爲懼相愛如吾兄高識如吾兄曾
無片言激勵之及他復何望也前與兄論子貢貨殖孔
子以爲不受命事昨偶閱程氏年表則知伊川固嘗言
之蓋貧富有命天下之貨殖者亦多矣必以子貢晚歲
之富爲貨殖所致則孔子執鞭之云爲不足信耶即日
眼尚昏花看書數行復閉久之得吾兄手翰因復強答

如在霧中書也所命送行詩但僕已會領命而吾兄又已諾彼之請固當一作然此事亦能耗亂人神思今後欲少戒也詩經曾草草讀過每以未及溫習爲念冀吾兄有以教我然在京塵中讀書非併力焉所得亦無幾矣僕之有兄如蓬之有麻所望夾持不淺不然則今日所言無乃爲白首一嘆之資乎

與汪汝成

東坡集十九冊奉還此老文字只是氣過人却有大狼狽處爲其無見而意在詼諧譬如劇戲媚人者一時庸俗人觀之非不喜好而端人正士則有憾額不欲觀者

若歐陽氏集中即無此矣歐蘇三公迄未有差其優劣者今但與足下言之

復豐生

誦佳章殊甚敬羨不揣輒有復於左右自夢仙歌以後忽又別進一格可異也內訟一賦尤見志識所贈飛霞子諸作雖一時興寓未必出於誠好然其中主靜養氣之云苟能充實亦崇德廣業之基豈特晦翁所謂長生久視之要訣而已足下青年美質文詞宜非所難誠於此加意深培所至復可涯耶

寄豐白菴

都城拜違後悵仰不已生自念賦性迂昧寡合特甚久
辱執事過愛不自知其所以廼今又復遠離情寔叵堪
聞途中盜賊頗熾尤切絀懷累枉華札知己達德爲
之少慰想辰下榮旆正抵南都文場士林瞻望風采山
川秀淑舉目可怡回首越江白雲只尺人生樂事可想
而不可及誰謂世上無真蘧萊吾不信也天氣向寒惟
爲國加重

寄魏子才

前數年與足下別後固以足下才識不倫往來於懷然
竊有所未滿焉者未敢以告也去秋幸再接言笑則舊

時所爲未滿者足 已剗削殆盡令人企竦第相見日
淺未獲盡扣所得而區區鄙見所未歷於清聽者亦多
懷企之深足下可諒知矣別來又過半載思之莽然昨
日耳光陰迅速一至於此豈徒以增感時恨別之情凡
有志於自脩者卽此亦可以惕然而省悟矣向所與足
下累日未盡者今固非尺牘可書大都人之自修病於
不勇其奮勵兢惕之時不過是其欲上人之心所使纔
降却此心便已不覺頽惰委靡故能自治其矜已爲人
之意而果確不怠爲難孟子所謂勿忘勿助正吾曹所
當厚勉而深省者也舊嘗承諭以訪人才一事固亦格

物之務然孔子有言曰夫我則不暇但常敬以自持而
於接人之際因其動言氣貌以察其邪正是亦窮理之
事若曰將以備他日之用則恐古之以人事君者或不
若是之豫也人患不能明理明理則藻鑑在我藻鑑在
我則他日用人之際不過舉我所知而桡無遺賢矣今
日訪人才其邪正善惡果能核其實與否我不敢知且
焉得人人而訪之邪又是下不欲看莊列等書第恐為
莊列所動耳若不為所動看亦何害當知芻蕘之言亦
有至理顧吾所以擇取之者何如耳知見欲高故學欲
博學之博則有以究治亂之故達天人之際而謝子之

所謂貴乎有根者可以自植矣望足下深惟實勝之善
致力於所不睹不聞以期大成毋爲自負可也嗟冷不
常萬萬以道自重

張文定公環碧堂集卷之二

張文定公環碧堂集卷之二

書東 二十一首

寄王伯安

去秋陸文順僉事行奉一啓尋即執事有移表之命未
諗得達否辰下伏計已抵廬陵冬間入覲可幸奉晤邦
奇居京塵中無一足道惟有懷企耳古之人有言曰莖
芷變而不芳兮蘭蕙化而爲茅僕竊以爲荷真蘭蕙也
則豈有爲茅之理其所以化而爲茅亦惟其根之不植
徒襲蘭蕙之芳馨以爲已有故一遇動搖凋落不暇耳
夫所謂蘭蕙者乎懷企之深亦可

以想見矣餘惟加重不能悉

寄易欽之

食炙雋者恒忘其美久不食則思之矣僕與足下交得無亦類是乎僕近者一切世味可謂徧嘗雖自謂古之易牙不能過也廼者慕足下甚深足下能諒我乎如僕者誠非所以處今之世然亦因得以致力於其所願應酬人事之暇每以三分為率以二分工夫讀書一分靜坐雖未敢為有得然視前時似亦稍進耳故人聚散踪跡感慨之懷來諭謂已能諒我故不叙叙亦不能盡也臨帑慨然

答魏子才

前蒙示余子積性書冗未及細觀故稽奉復廼者閱之
見子積用心過世俗人遠矣雖然竊有病焉性理之說
到宋儒可謂浩繁余子積乃爲之註疏何其不憚贅也
來諭以爲有發明至到虛不知指何者而言僕殊未之
見也聖人作易六畫而已而天下之理具傳曰大天之
道曰陰與陽又曰一陰一陽之謂道則道固不外乎陰
陽明矣后之論者各見夫道之一偏故有性惡善惡混
之說正孔子所謂仁者見之謂之仁知者見之謂之知
也周茂叔見其紛亂無緒乃繹其所以然而大太極圖

程子因之指夫性之善惡清濁之異者曰是氣質之性也而性之說始明且備矣太極圖另大一圈於上爲太極而繼之以陰靜陽動其視易之六畫爲更挑剔矣蓋承孔子形而上者之云而喫緊爲人不得已之意也惟程子知之故其論理氣處皆含蓄斟酌自是而後儒者輦出動必以理氣對言蓋雖未嘗不是而分拆太過遂使後之徒循口語以求理者以理氣若果爲二物而先儒立言之意晦矣求以明之適以晦之此知道者之所以不貴於多言也子積諄諄以理氣對待大說至以互分體用而曰體之虛者甚於用之虛則支離極矣且所

病於子積者不寧惟是士之立言者有有德之言有道之言天下有此兩道而已有德之言言其所得造道云者雖未至於有德而其知見之真已不容已於行矣夫苟不能行而曰我知之吾不信也聞子積於有養之功已自謂不能則固豈造道者哉而徒欲筆之於書以播天下而傳後世其將孰誣邪未幸於子積相識足下倘書往爲我盡達之其以爲何如也畫工不好圖狗馬而好圖僊釋又當與足下戒之姑勉爲切問近思之學耳得於口耳雖多亦奚以爲乍暄伏冀以道自王

答汪汝成

辱手書有羅從愿之感僕所言目病而心清者信不虛
耶忻羨忻羨竊惟足下此念千古一機緘也不可無詞
以答邦奇鈍劣不足道然向道之心實未嘗已朝夕存
養不敢自怠然所以遲久不進者恒若事緒太多譬如
揚子江宿浪未平而風濤又時撼之無怪其不能靜也
若來諭所謂紛華盛麗則近已漸能擺脫蓋嘗以爲紛
華盛麗者婦人之所宜悅也人年不過百歲然大率得
至六十七十者稱有壽矣而婦人者終其身焉而已者
也紛華盛麗以終其身曰如是足矣他無所望矣若男
子者則將有事於天地四方以媲前古而垂無窮其何

紛華盛麗之足動婦人所期止於六七十歲而男子之
慮存乎千百歲之外彼紛華盛麗之於人如飄風遇瓦
浮雲過目玩弄未幾而流焉以去自古及今消沉磨滅
何可勝數曾是之不悅而足以爲丈夫也哉且天下之
物其難成者難毀而易致者亦易滅天下之難成者孰
如道德功業也哉其易致者孰如紛華聲利也哉紛華
聲利其來不能正其去不能圉無所由致者也語今之
所以致者則吾亦知其然矣曰同吾形焉同吾聲焉耳
矣若是其難乎哉其不難乎哉雖由是以至卿相其可
也古之所謂大聖賢者蓋其運如天其靜如地其明如

日月其動如四時夫天地日月四時寧有窮也哉故能與之無窮聖賢之道吾寧學焉而不至婦人之所爲甘心者吾弗慕之矣比每得清坐片時即洒然而樂因其惡與接物之意近覺非是蓋爲學必務遜志當其應事時正可自驗而與人交時又可審人氣貌可觀吾慕之言動可取吾師之反是則吾以爲戒焉是又何與物接之足惡也承示四書備忘錄甚見用心之密愚見亦微有異同蓋小小文義之間耳燈窓聚首尚當談辨以求益也恃知愛輒敢吐露狂言

答魏子才

京塵中人事紛拏如麻雖亦無往非學然系未植根
終不耐動搖耳聞南都人事甚簡足下所處如此乃
有不亡之歎何耶前者書中謂僕所與伯潛書註解
辭以爲不能忘情於文字則非僕本意蓋因感時俗
善變者故援楚詞以一發其悲歎之意伯潛素誠實
特及此若以爲註釋楚詞則平日讀書所得亦多何
獨於一篇書中特解此一二明白易見之語哉昨復
得手教喜慰所諭猶有隱憂誠如尊見今固不敢細
陳足下亦自可想也天之七政所以運行而不失其
序亦係其樞而已矣則今日施爲緩急又何待於言
耶此惟可

爲知者一太息耳柰何柰何明年例當得歸省期以二
三月啟行未知如何明道生之謂性一段前以水之下
喻性之善後以清濁喻善惡各自爲喻不必求其相貫
必欲相貫則當以水之本下喻性之本善亦自不妨蓋
水之過潏也或激之其濁也或滓之皆非其本然也但
古人出言成章無往不可不似規規作時文者必欲首
尾相應也看書要看得活正爲此等旬日前荆妻疾暴
作幾殆近始畧愈明早又當入司禮書館匆匆中不盡
所言

與魏子才

汪汝登去附一柬諒達左右勝京塵無奈冗何目下且
治行具爲束歸計吾兄近來進向如何承翰責饒不肯
多言不覺愧悚此道理儒先發明儘覺明白吾輩正不
須多言董子曰事在勉強惟此望吾兄耳近得友告姓
綰名宗賢其字今爲後府都事此友識見精邁眼中所
少又新改庶吉士曰應良字元忠其人溫而粹哲而毅
皆可人也恨不久當離索耳京中連日風霾殊可憂悽
乘便草畧布此惟亮之不能悉

寄汪汝成

與兄交十餘年矣追惟聚散可勝感慨忽忽年各及壯

所就竟如何濱行辱贈教有相湏相成之言顧謔惕然
耳僕十月十二日幸平安抵家登堂稽首庭闈懽動但
老親雖幸尚徙而容髮漸衰况復追念往昔喜極而悲
有不自任者耳僻處海隅廟堂事了不得聞北望悵悵
京中與兄往復論議各傷刻兄居刑曹恐尤宜切戒
家間居室隘甚帶回書籍至今未開束版擾擾日夕緬
懷增愧方召匠治一小樓欲以爲十年規維孤陋是懼
耳叨荷

聖恩寧獨無犬馬心但老親年望七十伶仃一身復欲
舍去以遠遊數千里外此乾坤何等情邪將復何爲於

天地間哉固兄所能亮也言不盡意

與魏子才

前月具一書託孫水部附上適蒙手教甚慰積久懸懸之念且聞去冬有弄璋之喜此在僕所尤難得者甚爲足下欣忭也尊稿辯駁祭儀諸篇未覺深老其用工節度實已斟酌停當謹當揭之常按之處爲自修之規又承諭以間斷及雜慮二者爲用功之難此固人通患也邦奇亦嘗體驗大都雜念之多不勝驅除正坐間斷之故間斷旣久介然之頃便欲雜念頓釋雖顏子不能晝夜持守不怠則此心自當漸清盤銘之辭與揚子江宿浪

之譬真善喻也每惟孟敏墮甕不顧雖是細事亦足以
觀此人胸中擺脫得下故不知不覺之間自能如此而
史氏不知以爲有分辨而已此豈林宗之見哉吾輩試
自念只與人接幾句閒話而將迎之意纏擾不已此其
出孟敏下亦遠矣今直須於一切世故都打得破自毀
譽欣戚以至死生禍福一切視之如一則此心自定易
曰艮其背不獲其身行其庭不見其人此學之的也程
子嘗言除卻身都是義理懸空只是箇義理橫渠所謂
道能物身亦是此意張思叔讀孟子至志士不忘在溝
壑忽然自悟始覺有得力處可見古之有志者直是不

有其身故能專志於道不然一暴十寒之病且不能免
其去不學者幾何哉雖然又須細心涵詠密其功而寬
其效助長之害亦不小也足下明敏之資於世事不患
不能但專用力於大本田地使洒然脫落則百事易為
孔子所以獨與曾點而周茂叔每令二程尋孔顏樂處
其意可思也與足下別七月矣殊無寸進柰何每以不
得相聚首爲恨有得幸不惜頻教

復魏子才

書至甚慰企想讀性說益知足下踐履篤實玩心高明
三復之餘令人惕然蓋皆出自胷中非泛焉爲口耳之

學故自有真切動人處且謙冲之心問於不能充有道者氣象邦奇固陋比犇馳往往荒舊志忽辱引誘不覺慙悚然鄙見不敢不盡幸有以教之性之爲氣質尚矣來論必以天命之本然者爲性而以性之對習而言者於字義屬假借此似於理有未瑩思慮太過強探力索之餘不覺其言之牽合耳孟子言性善出易傳繼善成性固也傳不云一陰一陽之謂道大天之道曰陰與陽乎周子不云陰陽一太極程子不云氣卽性性卽氣乎聖賢未嘗離陰陽而言道亦安得舍氣稟而言性乎且曰形而上者謂之道亦未嘗離形而言道也今過察於

上下之間而不覺爲難形之論所謂毫釐之差也上懼
焉荀楊韓子之論性鑒鑒皆真不可不謂之是但見其
異而不知其同據其末而不探其本其弊將至於達
常而禍人道不可不謂之非孟子道性善蓋則獨見其
大原故不當與荀楊韓子者偶也然不若孔子之脩也
孔子曰性相近也習相遠也唯上智與下愚不移則如
天之無不覆也如地之無不載也萬世論性者皆無以
出此也且天之生人萬有不齊旣曰相近則天命之善
者固主乎其間矣世之言下愚者莫如傑紂伊尹五就
而不遷比干三諫而益怒此其強戾不明誰實使之焉

可謂非性邪故程子曰惡亦不可不謂之性也而孟子
言性善者探其本耳何則言紂者知足以飾非則彼猶
知非之爲非不欲以自居而飾之也此非其本心之明
猶自有在也乎使能及而求之則下愚不移者亦可得
而移矣此理之固然者也夫下愚如紂乃性之最相遠
者而猶有本心之明焉而况於所謂相近之中者乎故
孟子曰人性皆善可以爲堯舜也足下因性與天道不
可得聞之說而曰性命之說不見於論語且曰一見孔
子言性而遂以爲真則聖人群言之中容有一二言者
荒誕淺俚而不可據耶且此又安知非端木氏所記也

抑孟子言性亦未始離氣質也怵惕惻隱者情也情也者氣質已成而動者也天下豈有未受氣質而先有怵惕惻隱者耶彼蓋因其動之善人人之所固有者而明其本體之善耳

復李仁仲大參

湖湘每枉教翰冗迫往往失裁謝長懷感忤去冬聞董山亞卿先生云執事今秋當相表道經梓國日遲消息冀得暫近風範少沃渴心已而聞不果行坐馳數千里之程日不知幾回也忽使至辱示全稿且書丁寧命爲點勘并序卷端自顧寡昧承命悚汗殊不敢當然珍

重萬里之托欲辭不可且自妄冀或得托名簡編施於後世亦史遷所謂附青雲之一事也莊誦浹旬固知群玉府中無可區擇然其間精光絢爛特異或雖初矚如不見灼爍而涵蘊無窮有未易窺識者謬圈點其旁其他雖工而易識不復點綴蓋槩梗其所易識則人將忽其難曉故此法祇以喻衆人云爾非固軒輊於其間也不然選睡龍之珠已爲可嘆况具眼非劉會孟父當識少陵化哉其文字浩瀚成篇尤非詩法可以句摘故不敢蠅玉竊觀古名家集率先詩而後文愚意欲以言卷文字易置第四卷祭文之前別爲一卷似得倫次又如

少陵昌黎集每卷之前不註作者姓名蓋通部出一手
既顯標其號而復著姓名表首其爲贅無疑此論面聞
西涯文正公今其集中所答友人一書亦詳言之未知
高見以爲何如也序一首試錄呈稿極知蕪陋伏唯是
正幸甚外近作數首并祈暨敎生去秋以給由便道送
親抵家告親老多疾少弟尚幼遂上乞休疏平生所欲
誠不止此然知命者安義知數者仁親亦旣念之熟矣
執事才大而學老勞積而望日隆流於旣足發於持滿
勢固不容以已惟爲蒼生安以俟之而已萬里緘辭有
懷莫盡

寄董中峰

久處荒陲何意得親光霽欣慰不可言第大洋臨晚未
遂而去不知何日復了此緣耳比與子華相約晉拜為
日已久適老母小恙不能果敢先以書啓幸賜照察屬
者伏見執事忘地佐之高親臨海隅將覓壻於白屋之
下其遠識高誼豈區區世俗之見可同日語哉駑馬不
登於伯樂之廐硃硃不入於下氏之手他日今居之權
照相飲之美固不筮可知也邦奇雖暗劣亦竊以所聞
自思惟敢用一言贊成高誼倘賜諸陳氏所將禮
議者直命幸幸時化曉進恐不敢深探以奇素在

愛上以情為言一萬萬亮琴易有疑此

寄董老先生

比久欲晉拜牽於私顧未克如願不勝企懷伏唯執事
正重仁明天佑多福輒恃愛僭有遺問敬邑陳氏有子
鳳票令資年方十三儼如老成歲敏慧於沉重繼精銳
於謙抑平姿秀茂動止詳雅其為過大之器倡無可疑
近蒙令嗣文王年兄臨視雖言成於東床尚俟言於廷
府然陳氏以舉大非偶深望憐及諸生繆辱通家之末
托為元容幸唯憐賜金誥則當臨陳氏之知感哉舍親
戴時化行謹此代面啓敢希鑒察不備

寄潘南山先生

生無似側聞道義之風三十年傾慕就動而振趨未遂
然幸辱交令甥於執事言論風聲指示音親炙然者而
執事或未之知也輒不自量僭有聞於左右不自知其
可否幸執事試垂聽焉竊聞擇婿之論尚矣班姑孟光
共允卓卓然者近世伊以之論以爲使贅女辱於凡夫
不如勿嫁蓋致嚴如此恭聞公外孫女淑慧夙成倪公
之妹敝邑有陳氏子年方十三丰姿秀茂應對詳雅
敏慧於沉重縹緲美銳於譙抑其爲遠大之器似無可
况其父兄師友率非凡庸姻族門楣亦多門閥近辱公

甥親賜臨視雖已知其可誅但尤不敢自尊或者以道
遠為嫌將致疑豫夫聲氣苟同卽四海可以家視不然
同室之內九疑橫焉奚取於近哉故凡區區較遠近而
已者窺觀之貞非丈夫之見也而况一二百里之間本
不為遠者乎執事曠懷達節固當無疑於此敢望深念
鯁生之言以成天作之合俾清冰潤玉繩繩輝映其何
幸如之辱令甥一日之雅敢僭為先容伏唯照察幸甚

復董鏡山

杭城期得再會不意賊俘至踉蹌而行過貴境欲晉拜
老先生舟漏且窄老親不欲久泊亦不果悚罪悚罪辱

遺令姪遠臨兼得手翰厚儀邦奇適在慈溪歸之日令
姪去二日矣感激快悚莫能自喻海隅荒僻天門萬里
杳不知音信執事進止無所於扣不勝企懷翰至得承
運靚爲慰邦奇正月間遣上乞休疏未得回報平生所
期豈其止此顧私情所迫有不得不然者或者義之所
在即其命耶蒙執事平日謬愛所以期望引掖之者不
淺向會嚴涇中兄亦畧道及私情輒痛阻不啻口出故
人相愛之情徃徃如此今但啣感於心罷勉自修而已
孔子之所謂同心孟子之所謂趨一者皆不必其迹之同
聞老夫人壽七十欲審誕期走拜家貧乏力徃時所携

數僮盡驅農畝附近姐家亦有未及到者西瞻不任馳
情伏惟亮原

復陳朝儀

辱索承德堂記不自揣量輒恃舊憂安有瀆於清覽執
事復令刪改尤刃至厚幸甚感甚僕因來翰無事實故
惟受姓之始遂借以明其有德而興失德而替誠不自
知其妄也承執事命改之時正如剡溪乘興興盡卽止
遂不復致思旣而兩辱翰速乃反覆沉思欲更亦易之
又莫知所措手屈原自叙自高陽氏楊雄自有姓氏近
世韓子作竇氏墓銘推本於后緡送何生則曰何於韓

同姓爲近王歐蘇氏譜率遠推所始如此類甚多不可
勝舉况彼皆自叙而僕爲托人言耶若狄梁公曾子固
之事僕固亦聞之矣盖近世同姓者爲其枝派已分莫
知承屬固不得援以爲祖若其受姓之初必出於一如
執事陳姓以爲陳敬仲陳平之後則不敢若曰出於虞
帝則無可疑者昔人謂行萬里道讀萬卷書方可讀杜
詩信者學不可不博耶遠意不可虛辱敢誦言之且所
云拒之甚嚴者僕何敢爲拒也僕何敢爲拒也伏唯亮
察歲晏東還當面盡所懷宸下千萬以道自護

答魏子才

僕自十月七日抵家每欲奉問迄無使人王生來僕適
入城不及會面深用爲恨欲更前會脩啓起居則數僅
方治旧事乏人隨後不能果承遠示手書感慰殊甚敢
試條答以代晤語邦奇臆月上乞休疏未得回報日逐
事事只一部論語其大綱則所謂志道據德游藝者是
也海隅勝友難得恨不與尊兄同產一方來諭千里猶
一堂者僕亦以是望足下也湖湘之士能相信於道者
數人其次則有能知其梗槩者他日亦不至陷於惡矣
常德一府頗或溺於邪說蔽固十餘年非旦夕可開內
亦有穎悟如唐愈賢者便易得轉動然地方環數萬里

生徒萬餘不得專與相處未知終竟如何耳朱子所謂
因良心發見之微猛省提撕使心不放云恐不甚瑩既
是良心發見如何又用猛省提撕夫子云性相近也萬
世論性者皆不能出此矣孟子道性善是因當時只見
得下一截了故探性之本而言之性字從心從生蓋已
在人物身上了便都是氣質氣質未稟之先這便是理
理氣本非二故明道謂性卽氣是孔子之說畢竟是理
主乎氣故伊川謂性卽理是孟子之說來論以二說為
判乎不相一只為平日將理氣太分析了故有此滯礙
望更涵詠使脫然融會則千言萬語觸目洞心大小大

快活孔之不惑孟之知言皆此而已堂上老先生老夫
人想俱康熙僕幸二親粗安邇歲連生三女尚未有子
承問及故告之令郎想知向學充之何故今與兄希會
外書一緘幸轉致

寄湖廣省城兩學師生

區區去冬東行脩歷險阻老母因是得疾不果北上欲
告終養恐吏部行勘徃復日久故上章遽求休致冀得
早有代者不意部中未見深察近復移文催取然區區
亦患耳鳴目昏惡阻之疾終難強起已再致前意想七

月得達

天聽也念在湖五年雖心力不敢不盡而地大才綿罔
所裨補所望諸生篤志力行及時進修今雖遠別但此
心不忘固有所謂千里如面者區區雖退處不償平生
萬一亦自私太課程日求進益蓋爲善最樂乃自己受
用不然醉生夢死於天壤間豈不哀哉向見會試錄湖
廣連捷者八人而魁元半天下甚喜文風之盛第平時
所願猶不止此而省城之觖望尤甚時固自有在耳

寄戴秉誠先生

別來兩月翠竹蒼波掩映縈迴之地時有夢落其間思

其地耶思其人耶德州會汪汝成相與道高致崇南歸
接見間諒亦必道及區區也客中情棕言莫能盡望雲
之思補天之志交集于心朝夕耿耿今歲不知從遊幾
人講論緒餘便中幸遠示一二萬萬乍熱伏惟以道自
重不具

寄豐存禮

居家不得頻接言論別後徒遐想耳比想造詣當益精
純健羨健羨貴軀清甚近復何如僕常自驗但精神不
完則志意不覺惛慢雖對墳籍似與不甚相涵在高明
諒必不然特愛中姑一言之耳冬寒千萬以道自護

復葉生

姑蘇幸會片頃恨未及扣所蘊彙然英資精實已竊敬
畏別後不勝懸懸近得手書甚慰但所索經書題愧
不能答抑非所望於賢者也如足下英譽於經書諒已
淹貫他日就試自當左右逢原何題之預擇敢望屏除
外務靜坐一室用志不分乃移於神雖千載之上之人
之心將與我昭合而况於今人又安能外我承不遐棄
輒敢有復於左右惟高明其裁察之不具

與陳朝儀

傑厚望於足下數年矣日垂顧辱示所作時文藹然舊

日情好忻荷忻荷惟足下才氣四足自當慎無曰命云
命云僕於天命近自謂能見一二然聖人不言命乃所
謂知命况人事萬分一或未至而徒自比於僥倖偶得
之流以爲是天命也則豈惟不知命其大志之卑陋識
量之淺狹亦已甚矣佳作二冊歟復向已曾面告茲不
再大抵貴精不貴多昔人已有定論惟萬萬亮之

張文定公環碧堂集卷之三